

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj u Sarajevu 23.05.2016. godine, d o n o s i

PROPOZICIJE
Premijer ženske lige BiH
u takmičarskoj 2016/2017. godini

OPŠTE ODREDBE

Član 1.

Ovim Propozicijama utvrđuje se način organizovanja i provođenja takmičenja Premijer ženske lige BiH u takmičarskoj godini 2016/2017.

UČESNICI TAKMIČENJA

Član 2.

Premijer ženska liga BiH broji 8 klubova i to:

- 6 prvoplasiranih klubova na kraju takmičarske 2015/16 sezone,
- Prvoplasirani klub iz Prve ženske lige NSFBiH na kraju takmičarske 2015/16 sezone,
- Prvoplasirani klub iz Prve lige FS RS na kraju takmičarske 2015/16 sezone.

Na kraju takmičarske 2016/17. godine iz Premijer ženske lige BiH ispadaju dva najslabije plasirana kluba.

Svi klubovi koji učestvuju u takmičenju moraju imati i U-17 selekciju koja učestvuje u paralelnom takmičenju na nivou NS/FS BiH. Klub koji nema pomenutu selekciju, ne može nastupati u Premijer ženskoj ligi BiH, a umjesto njega nastupa klub koji je zauzeo prethodno mjesto na tabeli nakon završetka sezone 2015/16.

Popuna Premijer ženske lige BiH vrši se sa prvoplasiranim klubovima iz Prvih liga Nogometnog saveza Federacije BiH i Fudbalskog saveza Republike Srpske.

ORGANIZACIJA TAKMIČENJA

Član 3.

Takmičenjem u Premijer ženskoj ligi BiH rukovodi Komitet za takmičenje NS/FS BiH, u saradnji sa Sektorom za takmičenja i upravljanje događajima NS/FS BiH.

Član 4.

Takmičenje u Premijer ženskoj ligi se odvija po bod sistemu u dva dijela.

U prvom dijelu igra se: dvokružno (7 + 7=14 kola), a u drugom dijelu se razigrava na slijedeći način:

- LIGA ZA PRVAKA: 1 – 4. plasirani klub iz prvog dijela takmičenja, dvokružno (3+3=6 kola)
- LIGA ZA OSTANAK: 5 – 8. plasirani klub iz prvog dijela takmičenja, dvokružno (3+3=6 kola)

U drugi dio takmičenja klubovi prenose sve osvojene bodove i gol razliku ostvarenu temeljem rezultata utakmica prvog dijela takmičenja.

Raspored utakmica za prvi dio određuje se ždrijebom takmičarskih brojeva klubova uz primjenu "Bergerove tablice", abecednim redom naziva klubova.

Raspored utakmica za drugi dio takmičenja određuje se uz primjenu "Bergerove tablice" time da klubovi dobivaju takmičarske brojeve identične ostvarenom plasmanu u pojedinu ligu (od 1. do 4.). U slučaju da dva ili više klubova ostvare identičan plasman u drugi dio takmičenja, takmičarski brojevi tih klubova određuju se ždrijebom.

Član 5.

Utakmice se igraju u dva dijela po 45 minuta. Odmor između dva dijela igre traje minimalno 10, a maksimalno 15 minuta.

Član 6.

Klubovi su obavezni da najkasnije u roku od 10 dana prije termina žrijeba dostave u Odjel za takmičenje:

- naziv stadiona i alternativnog stadiona na kome će igrati utakmice;
- mjesto i vrijeme odigravanje utakmica (subota-nedelja);
- boju opreme (gaćice, majica i dokoljenice) i rezervnu boju sa kojom će klub nastupati.

Igračice Premijer ženske lige BiH obavezne su na lijevom rukavu majice nositi logo takmičenja.

Član 7.

Dva posljednja prvenstvena kola oba dijela takmičenja igraju se istog dana i u isto vrijeme.

PROMJENA TERMINA ODIGRAVANJA UTAKMICA

Član 8.

Promjena termina odigravanja utakmice može se vršiti na osnovu podnesenog pismenog zahtjeva zainteresovanog kluba, koji mora biti podnesen Komitetu za takmičenje NS/FS BiH, najkasnije 8 (osam) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina s predloženom dokumentacijom, iz koje se može utvrditi opravdanost zahtjeva, kao i eventualni prijedlog za novi termin.

U slučaju kada zahtjev za promjenu termina odigravanja utakmice nije podnesen u predviđenom roku iz stava 1. ovog člana, klub je dužan dostaviti i pismenu saglasnost drugog kluba (protivnika) za promjenu termina odigravanja utakmice, a najkasnije u roku od 3 (tri) dana od dana utvrđenog termina utakmice.

Odluku o zahtjevu kluba za promjenu termina utakmice iz stavka 1. i 2. ovog člana donosi Komitet za takmičenje NS/FS BiH, s tim da se kod donošenja odluke moraju imati u vidu odredbe člana 19. i 20. Pravilnika o nogometnim/fudbalskim takmičenjima BiH.

Odluka Komiteta za takmičenje NS/FS BiH je konačna i ona se dostavlja zainteresiranim klubovima i ostalim sudionicima takmičenja.

DUŽNOSTI KLUBOVA

Član 9.

Klub domaćin je obavezan pripremiti teren za igru, a odluku o podobnosti terena za odigravanje utakmice donosi isključivo sudija utakmice.

Utakmice se mogu igrati na stadionima koji imaju saglasnost NS/FS BiH.

Član 10.

Klub je obavezan na stadion doći 90 minuta prije utakmice i nastupiti sa najboljim sastavom.

Član 11.

Takmičenje se administrativno vodi kroz COMET informacijski sistem. Klub domaćin obavezan je da delegatu utakmice stavi na raspolaganje računar i printer sa priključkom na internet.

Član 12.

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona, zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije u skladu sa Disciplinskim pravilnikom NS/FS BiH.

Član 13.

Klub domaćin će, na zahtjev gostujućeg kluba, a prema mogućnostima, izvršiti rezervaciju smještaja i ishrane, kao i starati se o njihovom dočeku, boravku i ispraćaju.

Sve troškove iz prethodnog stava snosi gostujuća ekipa, ako drugačije nije predviđeno posebnim sporazumom klubova.

Član 14.

Klub domaćin je dužan da preduzme sve mjere u cilju obezbjeđenja ličnosti: članova gostujuće ekipe i službenih lica prije utakmice, za vrijeme odigravanja utakmice i po završetku utakmice, sve do napuštanja stadiona i mjesta odigravanja utakmice.

Domaći klub je, također, dužan da obezbijedi odgovarajuću dežurnu redarsku službu dovoljnim brojem redara, te prisustvo pripadnika policije, ljekara, vozila hitne pomoći (ili adekvatnog zamjenskog vozila) i 2-4 lica sa nosilima i dovoljan broj sakupljača lopti (najmanje 6).

Klub-domaćin je obavezan nadležnoj policijskoj upravi prijaviti mjesto i vrijeme odigravanja utakmice, te druge relevantne podatke na zahtjev policijske uprave.

Bez pripadnika policije, vozila za hitnu pomoć i ljekara, utakmica se neće igrati.

Član 15.

Klub domaćin obavezan je nezavisnoj snimateljskoj kompaniji, koju ovlasti NS/FS BiH, omogućiti adekvatne uslove (na centralnom dijelu stadiona) za snimanje utakmice.

Također, TV kompaniji koja vrši direktni prijenos utakmice, klub je dužan osigurati punu sigurnost za opremu i djelatnike, za vrijeme i nakon završetka utakmice, u objektu stadiona.

Član 16.

Za vrijeme odigravanja prvenstvenih utakmica u stadionu, pored terena za igru, u tehničkom prostoru mogu se nalaziti sljedeća lica:

1. predstavnik kluba - prikladno obučen
2. glavni trener - prikladno obučen ili u trenerici kluba
3. dva pomoćna trenera
4. igrači u sportskoj opremi - u markerima
5. ljekar kluba
6. fizioterapeut.

Predstavnik kluba, glavni trener ili pomoćni trener ne mogu biti ista osoba.

Navedena lica obavezna su posjedovati odgovarajuću akreditaciju koju izdaje NS/FS BiH za tekuću takmičarsku sezonu.

Validnost izdatih potrebnih dokumenata mogu kontrolisati samo subjekti koji su ih i izdali, a delegat na utakmici utvrđuje njihovo posjedovanje, odnosno identitet predstavnika kluba.

Osobe čiji se identitet ne može utvrditi ne mogu se nalaziti u tehničkom prostoru, osim zamjenskih igračica za koje važe odredbe člana 21. Propozicija takmičenja.

NAJMANJI BROJ IGRAČICA U IGRI

Član 17.

Utakmica ne može da počne ako jedna od ekipa nema najmanje sedam igračica.

Igračice koje nisu upisane do početka utakmice u zapisnik sa utakmice ne mogu nastupiti na utakmici.

Ako jedna od ekipa za vrijeme igre ostane sa manje od sedam igračica, sudija je dužan da zaustavi igru, a ako u roku od pet minuta klub ne nastupi s minimalnim brojem igračica, sudija je dužan da označi kraj utakmice.

Član 18.

Svaka ekipa prijavljuje u zapisnik sa utakmice 18 igračica.

U igri učestvuje 11 prijavljenih igračica, a tokom igre mogu se izvršiti tri zamjene.

Član 19.

Ekipe na jednoj utakmici ne mogu igrati u istim ili sličnim bojama dresova. U protivnom, dresove će promijeniti domaća (prvoimenovana) ekipa.

PRAVO NASTUPA IGRAČICA

Član 20.

Na prvenstvenim utakmicama mogu nastupiti igračice koje su stekle pravo igranja prema odredbama Pravilnika o registraciji, statusu i transferu igrača NS/FS BiH, ukoliko su navršile 16 godina života, kao i igračice koje navršavaju 16 godina u kalendarskoj godini u kojoj se utakmica odigrava, ali sa obavezanim specijalističkim ljekarskim pregledom kod nadležne zdravstvene ustanove u BiH, ovjerenim u registracionom savezu, kojim se oglašava sposobnim za nastupanje na utakmicama seniorskog uzrasta.

Pravo nastupa igračica stranih državljanke regulisano je odredbama Pravilnika o registraciji, statusu i transferu igrača NS/FS BiH. Klub može imati više registrovanih igračica stranih državljanina, s tim što 3 (tri) igračice strane državljanke mogu biti upisane u zapisnik sa utakmice i imaju pravo nastupa na jednoj utakmici.

Igračice sa dvojnim državljanstvom ne smatraju se stranim državljanjkama.

IDENTITET IGRAČICA

Član 21.

Na prvenstvenim utakmicama mogu nastupiti samo igračice čiji je identitet utvrđen putem sportske legitimacije izdate od nadležnog organa za registraciju, a u slučaju njenog nedostatka identitet će se utvrditi na osnovu javne isprave: lične karte ili pasoša.

Ukoliko se identitet igračice utvrđuje na osnovu javne isprave, klub je obavezan na zahtjev Komiteta za takmičenje NS/FS BiH dostaviti u NS/FS BiH sportsku legitimaciju u roku od 24 sata.

Identitet se u pravilu utvrđuje prije početka utakmice.

Za igračice koje su zakasnile na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

Član 22.

Svaka igračica mora imati sportsku legitimaciju sa upisanim datumom i ovjerenim ljekarskim pregledom obavljenim u zdravstvenoj ustanovi u BiH ili, izuzetno, zvaničnu ljekarsku potvrdu o izvršenom ljekarskom pregledu u BiH.

Ljekarski pregled važi šest mjeseci, a za igračice mlađe od 17 godina četiri mjeseca.

Igračica koja nije upisana u zapisnik sa utakmice, ili koja nije izvršila ljekarski pregled, ne može nastupati na prvenstvenim utakmicama.

DELEGAT NA UTAKMICI

Član 23.

Delegata na utakmici u takmičenju Premijer ženske lige BiH i završnice Kupa BiH za žene, određuje Komitet za takmičenje NS/FS BiH, iz reda delegata BH Telecom Premijer lige BiH, Prve lige FS RS i Prve lige NS F BiH, te članova Odjela za takmičenje NS/FS BiH i sportskih radnika–žena kantonalnih/županijskih/područnih saveza.

Prava i obaveze delegata na utakmici na ovom nivou takmičenja, uređena su odredbama Pravilnika o nogometnim/fudbalskim takmičenjima BiH i Propozicijama takmičenja Premijer lige BiH za žene.

Delegat zastupa Komitet za takmičenje NS/FS BiH i ima vrhovni nadzor na utakmici.

Nakon određivanja, delegat dobija nalog e-mailom od Odjela za takmičenje u čijem sadržaju mora biti navedeno mjesto, vrijeme i satnica odigravanja utakmice.

Delegat na utakmici je obavezan održati radni sastanak(Brifing) 60 minuta prije zakazanog početka utakmice i odmah nakon odigrane utakmice unijeti sve podatke o utakmici (Izveštaj sa utakmice) u COMET sistem, sa kratkim opštim opisom dešavanja na utakmici, sa kojima upoznaje sudiju utakmice, koji nakon sravnjenja podataka svojom šifrom zaključuje utakmicu.

Delegat na utakmici je obavezan u roku od 24 sata po odigranoj utakmici sačiniti i zaključiti delegatski izvještaj , putem Comet-a, a odjelu za takmičenje dostaviti ovjerene spiskove igrača.

Ukoliko na utakmici dođe do incidenata, prekida utakmice, isključenja igrača, ili na zahtjev Komiteta za takmičenje NS/FS BiH, delegat i sudija su obavezni dostaviti dopunski izvještaj u roku od 24 sata po odigravanju utakmice.

POSMATRAČ SUĐENJA

Član 24.

Posmatrač suđenja određuje Komitet za sudije i suđenje NS/FS BiH.

Nakon određivanja, posmatrač suđenja dobija nalog elektronskim putem od Sekretarijata saveza u čijem sadržaju mora biti navedeno mjesto, vrijeme i satnica odigravanja utakmice.

Posmatrač suđenja daje brojčanu ocjenu suđenja u roku od 48 sati po završetku utakmice.

Izvještaj o suđenju posmatrač suđenja sastavlja prema Uputstvu o ocjenjivanju suđenja, i to u sistemu COMET-a, u roku od 48 sati po odigranoj utakmici.

SUDIJE / SUCI

Član 25.

Utakmice Premijer lige BiH za žene mogu voditi sudije sa liste ženskih sudija Premijer ženske lige BiH, koju sastavlja Komitet za sudije i suđenje NS/FS BiH, a po potrebi i sudije sa ostalih stepena takmičenja, čije određivanje vrši Komitet za sudije i suđenje NS/FS BiH.

Član 26.

Nakon određivanja, sudija dobija nalog elektronskim putem od Odjela za suđenje u čijem sadržaju mora biti navedeno mjesto, vrijeme i satnica odigravanja utakmice.

Član 27.

Sudija utakmice je dužan da prije početka utakmice pregleda i odluči da li je teren uslovan za igru. Ako sudija utvrdi da je teren neuslovan za igru, to konstatuje u zapisniku sa utakmice.

ZAPISNIK SA UTAKMICE

Član 28.

Delegat sastavlja zapisnik sa utakmice putem Comet-a. Klubovi su dužni 60 minuta prije početka utakmice dostaviti ovjeren i potpisan spisak igrača i službenika svoje ekipe na propisanom obrascu.

REGISTRACIJA UTAKMICA

Član 29.

Ako na utakmici nije uložena žalba, a ne postoje uslovi za registraciju po službenoj dužnosti, utakmica se registruje postignutim rezultatom.

Ako je prvostepena odluka pravosnažna, ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim/fudbalskim takmičenjima NS/FS BiH.

Komitet za takmičenje NS/FS BiH vrši registraciju odigranih utakmica na prvoj narednoj sjednici. Izuzetno, Komitet za takmičenje NS/FS BiH može vršiti registraciju odigranih utakmica putem e-maila, telefona, faksa.

Ako je uložena žalba, rok za registraciju utakmice se produžava do konačne odluke.

ŽALBE

Član 30.

Žalbe po svim osnovama moraju se telegramski ili telefaxom najaviti NS/FS BiH u roku od 24 sata po odigranoj utakmici, a obrazloženje sa dokazom o uplaćenju taksu ima se dostaviti NS/FS BiH u roku od 48 sati po odigranoj utakmici.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi naredni radni dan.

Žalba se dostavlja Komitetu za takmičenje NS/FS BiH.

Uz žalbu se dostavlja dokaz o uplaćenju taksi, u skladu sa odlukom IO NS/FS BiH.

Član 31.

Žalbe u prvom stepenu rješava Komitet za takmičenje NS/FS BiH, a u drugom stepenu Apelaciona komisija NS/FS BiH.

DISCIPLINSKE SANKCIJE

Član 32.

O disciplinskim prekršajima klubova, igrača, članova stručnog i tehničkog rukovodstva i funkcionera klubova koji učestvuju u takmičenju, odlučuje se na osnovu Disciplinskog pravilnika NS/FS BiH.

Drugostepene odluke po disciplinskim prekršajima su konačne.

U interesu regularnosti takmičenja nadležni organ može utvrditi i skraćeni žalbeni postupak.

UTVRĐIVANJE PLASMANA

Član 33.

Plasman klubova na tabeli utvrđuje se prema odredbama člana 46. Pravilnika o nogometnim/fudbalskim takmičenjima NS/FS BiH.

FINANSIJSKE ODREDBE

Član 34.

Prihodi sa prvenstvenih utakmica pripadaju klubu domaćinu.

NAGRADE

Član 35.

Nogometni/Fudbalski savez BiH prvoplasiranoj ekipi Premijer ženske lige BiH dodjeljuje prelazni i pehar u trajno vlasništvo.

Igračima, tehničkom i stručnom rukovodstvu prvoplasiranog kluba dodjeljuje se 35 zlatnih medalja.

Član 36.

Za osvojeno prvo mjesto u fair-playu klubu pripada pehar.

ZAVRŠNE ODREDBE

Član 37.

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima NS/FS BiH, Pravila nogometne/fudbalske igre i drugih propisa NS/FS BiH, FIFA-e i UEFA-e.

Član 38.

Propozicije stupaju na snagu danom donošenja, a primjenjuju se za takmičarsku sezonu 2016/2017.

P R E D S J E D N I K
Elvedin Begić, s.r.

